

四庫全書

集部

欽定四庫全書

唐百家詩選卷四

宋 王安石 編

岑參下三十一首

使交河郡

郡在火山脚其地苦
熱無雨雪獻封大夫

奉使按胡俗平明發輪臺暮投交河城火山赤崔嵬九
月尚流汗炎風吹沙埃何事陰陽工不遣雨雪來吾君
方憂邊分閩資大才昨者新破胡安西兵馬回鐵關控

天涯萬里何遼哉烟塵不敢飛白草空皚皚軍中日無
事醉舞傾金罍漢代李將軍微功今可咍

走馬川行奉送出師西行

君不見走馬滄海邊平沙莽莽黃入天輪臺九月風夜
吼一川碎石大如斗隨風滿地石亂走匈奴草黃馬正
肥金山西見烟塵飛漢家大將西出師將軍金甲夜不
脫半夜軍行戈相撥風頭如刀面如割馬毛帶雪汗氣
蒸五花連錢旋作冰幕中草檄硯水凝敵騎聞之應膽

懾料知短兵不敢接車師西門佇獻捷

熱海行送崔侍御還京

海中有
赤鯉

側聞陰山胡兒語西頭熱海水如煮海上衆鳥不敢飛
中有鯉魚長且肥岸傍青草常不歇空中白雲遙旋滅
蒸沙爍石燃胡雲拂浪炎波煎漢月陰火潛燒天地爐
何事偏烘西一隅勢入月窟侵太白氣連赤坂通單于
送君一醉天山郭正見夕陽海邊落柏臺霜威寒逼人熱
海炎氣為君薄

終南東溪中作

溪水碧於草潺潺花底流沙平堪濯足石淺不勝舟洗
藥朝與暮釣魚春復秋興來從所適還欲向滄洲

酬成少尹駱谷行見呈

聞君行路難惆悵臨長衢豈不憚險艱王程剩相拘憶
昨蓬萊宮新授刺史符明主仍賜衣價值千萬餘何幸
承命日得與夫子俱攜手出華省連鑣赴長途五馬當
路嘶按節投蜀都千巖信縈折一逕何盤紆層冰滑征

輪密竹礙隼旗深林迷昏旦棧道陵空虛飛雪縮馬毛烈
風擘我膚峰攢望天小亭午見日初夜宿月近人朝行
雲滿車泉澆石罅坼火入松心枯亞尹同心者風流賢
大夫榮祿上及親之官隨板輿高價振臺閣清詞出應
徐成都春酒香且用俸錢沽浮名何足道海上堪乘桴

韋貞外家花樹歌

今年春似去年好去年人到今年老知人老去不及花
可惜落花君莫掃君家兄弟不可當列卿太史尚書郎

朝回花底常會客
花撲玉缸春酒香

送盧郎中除杭州赴任

罷起郎官草初分
刺史符海雲迎過楚
江月引歸吳城
底濤聲震樓端
蜃氣孤干家
窺驛舫五馬飲春湖
柳色
供詩用鶯聲送酒須
知君望鄉處
枉道上姑蘇

趙少尹南亭送鄭侍御歸東臺

得長字

江亭酒斝香白面
繡衣郎砌冷蟲喧
座簾疎雨到床鐘
催離興急絃緩
醉歌長關樹應先
落隨君滿路霜

過緱山王處士黑石谷隱居

舊居緱山下偏識緱山雲處士久不還見雲如見君別
來餘十秋兵馬日紛紛青溪開戰場黑谷屯行軍遂令
巢由輩遠逐麋鹿羣獨有南澗水潺湲如昔聞

奉送李太保兼御史大夫充渭北節度

即太尉
光弼弟

詔出未央宮登壇近總戎上公周太保副相漢司空弓
抱關西月旗翻渭北風弟兄皆許國天地荷成功

送秘書虞校書赴虞鄉丞

花綬傍胥新關東縣欲春殘書厭科斗舊閣別騏驎虞
坂臨官舍條山映吏人看君有知己坦腹向平津

送王七錄事赴虢州

早歲即相知嗟君最後時青雲仍未達白髮欲成絲小
店關門樹長河華岳祠弘農人吏待莫使馬行遲

送懷州吳別駕

灞上柳枝黃壚頭酒正香春流飲去馬暮雨濕行裝驛
路通函谷州城接太行覃懷人總喜別駕得王祥

太白胡僧歌

并序

太白中峰絕頂有胡僧不知幾百歲眉長數寸身不製
繒帛衣以草葉常持楞伽經雲壁迴絕人跡罕到嘗東
峰有鬪虎弱者將死僧杖而解之西湫有毒龍久而為
患僧器而貯之商山趙叟前年採茯苓深入太白偶值
此僧訪我而說余恒有獨往之意聞而悅之乃為歌曰
聞有胡僧在太白蘭若去天三百尺一持楞伽入中峰
世人難見但聞鐘窗邊錫杖解兩虎床下鉢盂盛一龍

草衣不針亦不線兩耳垂肩眉覆面此僧年紀那得知
手種青松今十圍心將流水日清淨身與浮雲無是非
商山老人已曾識願一見之何由得山中有僧人不知
城裏看山空黛色

青門歌送東臺張判官

青門金鑠平旦開城頭日出使車回青門柳枝正堪折
路傍一日幾人別東出青門路不窮驛樓官樹灞陵東
花撲征衣看似錦雲隨去馬色疑驄胡姬酒壚日未午

絲繩玉缸酒如乳江頭花落沒馬蹄昨夜微雨花成泥
黃鸝翅濕飛屢低關東尺書醉嬾題須臾望君不可見
揚鞭飛鞚疾於箭借問使乎何時來莫作東飛伯勞西
飛燕

送費子歸武昌

漢陽歸客悲秋草旅舍葉飛愁不掃秋來倍憶武昌魚
夢著只在巴陵道曾隨上將過祁連離鄉十年恒在邊
劔鋒可惜虛用盡馬蹄無事今已穿知君開館常愛客

擣蒲百金每一擲平生有錢將與人江上故園空四壁
吾觀費子毛骨竒廣眉大口仍赤髭看君失路尚如此
人生貴賤那得知高秋八月歸南楚東門一壺聊出租
路指鳳皇山北雲衣沾鸚鵡洲邊雨勿歎蹉跎白髮新
應須守道勿羞貧男兒何必戀妻子莫向江村老却人

送張獻心充副使歸河西雜句

將門子君獨賢一從授命恒在邊未年三十已高位腰
間金印色絕然前日承恩白虎殿歸來見者誰不羨篋

中賜衣十萬餘案上軍書二千卷看君智謀若有神愛
君詩句皆清新澄湖萬頃深見底清冰一片光照人雲
中昨夜使星動西門驛樓出相送玉餅素蟻臘酒香金
鞍白馬紫遊韉花門南燕支北張掖城頭雲正黑送君
一去天外憶

送魏叔虹擢第歸東京因懷魏校書陸渾喬潭
井上桐葉赤灞亭卷秋風故人適戰勝走馬歸山東問
君如今三十幾能使香名滿人耳君不見三峰直上五

千仞見君文章亦如此如君兄弟天下稀雄詞健筆皆
若飛將軍金印驪紫綬御史鐵冠重繡衣喬生作尉別
來久因君為問平安否魏侯校理復何如前日人來不
得書陸渾山水佳可賞蓬閣閒時日應往自料青雲未
有期誰知白髮偏能長壚頭青絲白玉瓶別時相顧酒
初醒搖鞭舉袂忽不見千樹萬樹空蟬鳴

長門怨

君王嫌妾妬閉妾在長門舞袖垂新寵愁眉結舊恩綠

錢生履跡紅粉濕啼痕羞被桃花笑看春獨不言

宿關西客舍寄東山嚴許二山人時天寶高道

舉徵

雲送關西雨風傳渭北秋孤燈然客夢寒杵擣鄉愁灘
上思嚴子山中憶許由蒼生今有望飛詔下林丘

尋少室張山人聞與偃師周明府同入都

中峰鍊金客昨日遊人間葉縣鳧共去葛陂龍暫還暮
雲湊深秋雨懸空山寂寂青溪裏空餘丹竈閒

題匡城周少府廳壁

婦姑城南風雨秋
婦姑城中人獨愁
愁雲遮却望鄉處
數日不上西南樓
故人薄暮公事閒
玉壺美酒虎魄殷
潁陽秋草今黃盡
醉臥君家猶未還

杜公挽歌四首

銀青光祿大夫河西太守

蒙叟悲藏壑
殷宗惜濟川
長安非舊日
京兆是新阡
黃霸官猶屈
蒼生望已愆
唯餘卿月在
留向杜陵懸

鼓吹城中出墳塋
郭外新雨隨
思太守雲慘送夫人
蒿

里埋雙劍松門閉萬春回瞻北堂上金印已生塵
憶昨明光殿新承天子恩剖符移北地受鉞領西門塞
草迎軍幕邊雲拂使軒至今聞隴外戎虜尚亡魂

漫漫澄波澗耿耿大厦深秉心常匪石行義每揮金汲
引窺蘭室招攜入翰林多君有令子猶注世人心

輪臺歌奉送封大夫出師西征

輪臺城頭夜吹角輪臺城北旄頭落羽書昨夜過渠黎
單于已在金山西戍樓西望烟塵黑漢兵屯在輪臺北

上將擁旄西出征平明吹笛大軍行四邊伐鼓雪海湧
三軍大呼陰山動虜塞兵氣連雲屯戰場白骨纏草根
劔河風急雪片闊沙口石凍馬蹄脫亞相勤王甘苦辛
誓將報主靜邊塵古來青史誰不見今見功名勝古人

白雪歌送武判官

北風卷地白草折胡天八月即飛雪忽如一夜春風來
千樹萬樹梨花開散入珠簾濕羅幕狐裘不暖錦衾薄
將軍角弓不得控都護鐵衣冷難著瀚海闌干千尺冰

愁雲黯澹萬里凝中軍置酒飲歸客胡琴琵琶與羌笛
紛紛暮雪下轅門風掣紅旗凍不翻輪臺東門送君去
去時雪滿天山路山回路轉不見君雪上空留馬行處

送張都尉歸東郡

白羽綠弓絃年年祇在邊還家劔鋒盡出塞馬蹄穿逐
虜西踰海平胡北到天封侯應不遠燕領豈徒然

行軍九日思長安故園時未收長安

強欲登高去無人送酒來遙憐故園菊應傍戰場開

送賈侍御使江外

新騎驄馬復承恩，使出金陵過海門。
荆南渭北難相見，莫惜衫襟著酒痕。

儲光義二十一首

魯人天寶末為監察御史
安祿山任偽官賊平貶死

新豐道中作

西下長樂坂，東入新豐道。
雨多車馬稀，道上生秋草。
太陰蔽皋陸，莫知晚與早。
雲雷杳冥川，谷漫浩浩詔。
書植嘉木，二十八年有詔種果衆言桃李好，自顧無此容。
歸從漢陰

老

羣鴉詠

新宮驪山陰龍衮時出豫朝陽照羽儀清吹肅達路羣
鴉隨天車夜滿新豐樹所思在腐餘不復憂霜露河低
宮閣深燈隱鼓鐘曙繽紛起寒枝矯翼時相顧冢宰收
琳琅侍臣盡鴉鷺高舉摩太清永絕繒繳懼茲禽亦翺
翔不以微小故

野田黃雀行

金史卷之八十三
表四
嘖嘖野田雀不知軀體微閒穿深蒿裏爭食復爭飛窮
老一頽舍棗多桑樹稀無棗猶可食無桑何以衣蕭條
空倉暮相引時來歸邪路豈不捷渚田豈不肥水長路
且負惻惻與心違

效古

東風吹大河河水如倒流河洲沙塵起有若黃雲浮頽
霞燒廣澤洪曜赫高丘野老泣相逢無地可蔭麻翰林
有客卿獨負蒼生憂中夜起躑躅思欲獻厥謀君門峻

且深跼足空夷猶

尚書省聽誓戒貽太廟裴丞

皇家有恒憲齋祭崇明祀嚴車伊洛間受誓文昌裏沉
沉雲閣見稍稍城烏起曙色照衣冠虛庭鳴劔履徘徊
念私覲悵望臨清汜點翰欲何言相思從此始

田家即事

蒲葉日已長杏花日已滋老農要看此貴不違天時迎
晨起飯牛雙駕耕東菑蚯蚓土中出田烏隨我飛羣合

亂啄噪嗷嗷如道飢我心多惻隱顧此兩傷悲撥食與
田烏日暮空筐歸親戚更相誚我心終不移

田家雜興三首

春至鷓鴣鳴薄言向田墅不能自力作黽勉娶鄰女既
念生子孫方思廣園圃閒時相顧笑喜悅好禾黍夜夜
登嘯臺南望洞庭渚百草被霜露秋山響砧杵却羨故
年時中情無所取

梧桐陰我門薜荔網我屋超超兩夫婦朝出暮還宿稼

穡既自種牛羊還自牧日旰懶耕鋤登高望川陸空山
足禽獸墟落多喬木白馬誰家兒聯翩相馳逐

楚山有高士梁國有遺老築室既相鄰向田復同道糧
糒常共飯兒孫每更抱忘此耕耨勞媿彼風雨好蟋蟀
鳴空澤鷓鴣傷秋草日夕寒風來衣裳苦不早

同王十三維偶然作四首

野老本貧賤冒暑鋤瓜田一畦未及終樹下高枕眠荷
蓀者誰子皤皤來息肩不復問鄉墟相見但依然腹中

無一物高話羲皇年落日臨層隅逍遙望晴川使婦提
蠶筐呼兒榜魚船悠悠泛綠水去摘浦中蓮蓮花豔且
美使我不能還

仲夏日中時草木看欲焦田家惜功力把鋤來東臬顧
望浮雲陰往往誤傷苗歸來悲困極兄嫂相共饒無錢
可沽酒何以解劬勞夜深星漢明庭宇虛寥寥高柳三
五株可以獨逍遙

浮雲在虛空隨風復卷舒我心方處順動作何憂虞但

言嬰世網不復得閒居迢遞別東國超遙來西都見人
乃恭敬曾不問賢愚雖若不能言中心亦難誣故鄉滿
親戚道遠情日疎偶欲陳此意復無南飛鳧

北山種松柏南山種蒺藜出入雖同趣所尚各有宜孔
丘貴仁義老氏好無為我心若虛空此道將安施暫過
伊闕間晚晚三伏時高閣入雲中芙蓉滿清池要自非
我室還望南山陔

貽余處士

故園至新浦遙復未百里北望是他邦紛吾即遊士潮
來津門啟罷檝信流水客意乃成歡舟人亦相喜遲遲
菱荇上泛泛菰蒲裏漸聞商旅喧猶見鳧鷖起市亭忽
雲構方物如山峙吳王昔喪元隋帝又滅祀停艦一以
眺太息興亡理秋苑故池田宮門新柳杞我行苦炎月
乃及清昊始此地日逢迎終思隱君子莫言異卷舒形
音在心耳

泊舟貽潘少府

時潘少府
在後浦

行子苦風潮維舟未能發宵分卷前幔臥視清秋月四
澤葭葦深中洲煙火絕蒼蒼水霧起落落疎星沒所遇
盡漁商與言多楚越其如念極浦又以思明哲常若干
里餘況之異鄉別

幽居

幽人下山徑去去夾青林滑處莓苔濕暗中蘿薜深春
朝烟雨散猶帶浮雲陰

薔薇篇

裏裏長數尋青青不作林一莖獨秀當庭心數枝分作
滿庭陰春日遲遲欲將半庭影矜矜正堪翫枝上鶯嬌
不畏人葉裏蛾飛自相亂秦家女兒愛芳菲畫眉相喚
採菱蕤高處紅鬚欲就手低邊綠刺已牽衣蒲桃架上
朝光滿楊柳園中暝鳥飛連袂蹋歌從此去風吹香氣
逐人歸

臨江亭

晉家南作帝京鎮北為關江水中分地城樓下帶山金

陵事已往青蓋理無還落日空亭上愁看龍尾灣

仲夏入園東陂

方塘深且廣伊昔俯吾廬環岸垂綠柳盈潭發紅蕖上
延北原秀下屬幽人居暑雨若混沌晴明如空虛此鄉
多隱逸水陸見樵漁廢賞亦何貴為歡良易攄且言重
觀國當此賦歸歟

洛橋送別

河橋送客舟河水正安流遠見輕橈動遙憐故國遊海

禽逢早鴈江月值新秋一聽南津曲分明散別愁

題山中流泉

山中有流水借問不知名映地為天色飛空作雨聲轉
來深澗滿分出小池平恬澹無人見年年長自清

崔國輔二首

古意

歸來日尚早却欲向芳洲渡口水流急回舟不自由

對酒吟

行行日將夕荒村古冢無人跡
蒙龍荆棘一鳥飛屢唱
提壺酤酒喫古人不達酒不足
遺恨精靈傳此曲寄言
世上諸少年平生且盡杯中綠

崔顥七首

天寶中為尚書
司勳負外郎

黃鶴樓

昔人已乘黃鶴去此地空餘黃鶴樓
黃鶴一去不復返
白雲千載空悠悠晴川歷歷漢陽樹
春草萋萋鸚鵡洲
日暮鄉關何處是烟波江上使人愁

長安道

長安甲第高入雲誰家居住霍將軍日晚朝回擁賓從
路旁拜揖何紛紛莫言炙手手可熱須臾火盡灰亦滅
莫言貧賤即可欺人生富貴自有時一朝天子賜顏色
世上悠悠應始知

渭城少年行二首

洛陽二月梨花飛秦地行人春憶歸揚鞭走馬城南陌
朝逢驛使秦川客驛使前日發章臺傳道長安春早來

棠梨宮中燕初至蒲桃館裏花正開念此使人歸更早
三月便達長安道長安道上春可憐搖風蕩日曲江邊
萬戶樓臺臨渭水五陵花柳滿秦川

秦川寒食盛繁華遊子春來喜見家鬪雞下杜塵初合
走馬章臺日半斜章臺帝城稱貴里青樓日晚歌鐘起
貴里豪家白馬驕五陵年少不相饒雙雙挾彈來金市
兩兩鳴鞭上渭橋渭橋壚頭酒新熟金鞍白馬誰家宿
可憐錦瑟箏琵琶玉壺清酒就君家小婦春來不解羞

嬌歌一曲楊柳花

江南曲二首

君家何處住妾住在橫塘停船暫借問或可是同鄉
下渚多風浪蓮舟欲漸稀那能不相待獨自逆潮歸

定襄郡獄

我在河東時使往定襄里定襄諸小兒諍訟喧城市長
老莫敢言太守不能理謗書盈几案文墨相填委牽引
肆中翁追呼田家子我來折此獄師聽辨疑似小大必

得情未嘗施鞭捶是時三月暮遍野農桑起里巷鳴春
鳩田園引流水此鄉多雜俗戎夏殊音旨顧問邊塞人
勞情曷云已

陶翰一首

塞下曲

進軍飛狐北窮寇勢將變日落沙塵昏昔河更一戰駿
馬黃金勒彫弓白羽箭射殺左賢王歸奏未央殿欲言
塞下事天子不召見東出咸陽門哀哀淚如霰

常建三首 大歷中為盱眙尉

弔王將軍


嫖姚北伐時深入強千里戰餘落日黃軍敗鼓聲死嘗
聞漢飛將可奪單于壘今與山鬼鄰殘兵哭遼水

題破山寺後禪院

清晨入古寺初日照高林竹逕通幽處禪房花木深山
光悅鳥性潭影空人心萬籟此俱寂但餘鐘磬音

春詞

宛宛黃柳絲濛濛雜花垂日高紅妝臥倚對春光遲寧
知傍淇水驪裏黃金羈



唐百家詩選卷四

欽定四庫全書

集部

唐百家詩選卷五

六

詳校官中書臣張經田

助教臣常循覆勘

總校官原任中允臣王燕緒

校對官中書臣石鴻翁

謄錄監生臣喬元賦

謄錄監生臣沈錫爵

欽定四庫全書

唐百家詩選卷五

宋 王安石 編

○ 王昌齡二十三首

塞上曲二首

蟬鳴空桑林八月蕭關道
出塞入塞雲處處黃蘆草
從來幽并客皆向沙場老
莫學遊俠兒矜誇紫騮好

邊頭何慘慘已葬霍將軍
部曲皆相弔燕南代北聞
功

勲多被黜兵馬亦尋分更遣黃頭戍唯當哭塞雲

長信愁

奉帚平明秋殿開且將團扇共徘徊玉顏不及寒鴉色
猶帶昭陽日影來

放歌行

南渡洛陽津西望十二樓明堂坐天子月朔朝諸侯清
樂動千門皇風被九州慶雲從東來泱泱抱日流昇平
貴論道文墨將何求有詔徵草澤微誠將獻謀冠冕如

星羅拜揖曹與周望塵非吾事入賦且遲留幸蒙國士
識因脫負薪裘今者放歌行以慰梁甫愁但營數斗祿
奉養每豐羞願得金膏遂飛雲亦可儔

長歌行

曠野饒悲風颼颼多蒿草繫馬倚白楊誰知我懷抱所
是同袍者相逢盡衰老況登漢家陵南望長安道上有
枯樹根下有石鼠窠高皇子孫盡千載無人過寶玉頻
發掘精靈其奈何人生須信命有酒且長歌

青樓曲

白馬金鞍從武皇
旌旗十萬宿長楊
樓頭小婦鳴箏坐
遙見飛塵入建章

瑩篔引

盧溪郡南夜泊舟
夜聞南岸羌戎謳
其時月黑猿啾啾
微雨露衣令人愁
有一遷客登高樓
不言不寐彈瑩篔
彈作薊門桑葉秋
風沙颯颯青塚頭
將軍鐵驄汗血流
深入匈奴戰未休
黃旗一點兵馬收
亂殺胡人積如丘

瘡病驅來役邊州仍披漠北羊羔裘顏色飢枯掩面羞
眼眶淚滴深兩眸還思本鄉食犛牛欲語不得指咽喉
或有強壯能吶嘍意說被他邊將讐五世屬蕃漢主留
碧毛氈障河曲遊橐駝五萬部落稠勅賜飛鳳金兜鍪
為君百戰如過籌靜掃陰山無鳥投家藏鐵券特承優
黃金十斤不稱求九族分離作楚囚深溪寂寞絃苦幽
草木悲感聲颼颼僕本東山為國憂明光殿前論九疇
簾讀兵書盡冥搜為君掌上施權謀洞曉山川無與儔

紫宸發詔遠懷柔
搖筆飛霜如奪鉤
鬼神不得知其由
憐愛蒼生比虬蟬
朔河屯兵須漸抽
盡遣降來拜御溝
便令海內休戈矛
何用班超定遠侯
史臣書之得已不

從軍行

向夕臨大荒朔風軫歸慮
平沙萬餘里飛鳥宿何處
虜騎獵長原翩翩傍河去
邊聲搖白草海氣生黃霧
百戰苦風塵十年履霜露
雖投定遠筆未坐將軍樹
早知行路難悔不理章句

出塞行

白花垣上望京師
黃河水流無盡時
窮秋曠野行人絕
馬首東來知是誰

採蓮曲

荷葉羅裙一色裁
芙蓉向臉兩邊開
亂入池中看不見
聞歌始覺有人來

諸官遊招隱寺

山館人已空
青蘿換風雨
自從永明世
月向龍宮吐
鑿

井長幽泉白雲今如古應真坐松柏錫杖掛牕戶口云
七十餘能救諸有苦回指崑樹花如聞道場鼓金色身
壞滅真如性無主僚友同一心清光遣誰取

沙苑南渡頭

秋霧連雲白歸心浦淑懸津人空守纜村館復臨川峰
隔蒼茫雨波通演漾田孤舟未得濟入夢在何年

鄭縣宿陶大公館贈馮六元二

儒有輕王侯脫略當世務本家藍溪中非為漁弋故無

何困躬耕且欲馳永路幽居與君近出谷同所鶩昨日
辭石門五年變秋露雲龍未相感干謁亦已屢子為黃
綬羈余忝蓬山顧京門望西岳百里見郊樹飛雨祠上
來靄然關中暮驅車鄭城宿秉燭論往素山月出華陰
開此河渚霧清光比故人豁達展心晤馮公尚戢翼元
子仍跼步拂衣易為高論迹難有趣張范善始終吾等
豈不慕罷酒當涼風屈伸備冥數

和振上人秋夜懷士會

白露傷草木山風吹夜寒遙林夢親友高興發雲端一作

嵩郭外秋聲急城邊月色殘瑤琴多遠思更為客中彈

寄穆侍御出幽州

一從恩譴度瀟湘江北江南萬里長莫道薊門書信少
鴈飛猶得到衡陽

灞上閒居

鴻都有歸客偃臥滋陽村軒冕無枉顧清川照我門空
林網夕陽寒鳥赴荒園廓落時得意懷哉莫與言庭前

有孤鶴欲啄常翩翩為我銜素書弔彼顏與原二君既
不朽所以慰其冤

初日

初日淨金閨先照牀前暖斜光入羅幕稍稍親絲管雲
髮不能梳楊花更吹滿

採蓮

越女作桂舟還將桂為檝湖上水渺漫清江初可涉摘
取芙蓉花莫摘芙蓉葉將歸問夫婿顏色何如妾

出塞

秦時明月漢時關
萬里長征人未還
但使盧城飛將在
不教胡馬度陰山

同李四倉曹宅夜飲

霜天留飲故情歡
銀燭金爐夜不寒
欲問吳江別來處
青山明月夢中看

送韋十四兵曹

縣職如長纓
終日檢我身
平明趨郡府
不得展故人
故

人念江湖富貴如埃塵迹在戎府掾心遊天台春獨立
浦邊鶴白雲長相親南風忽至吳分散還入秦寒夜天
光白海靜月色真對坐論歲暮絃歌起無因平生馳驅
分非謂杯酒仁出處兩不合忠貞何由申看君孤舟去
且欲歌垂綸

別李南浦之京

故園今在灞陵西江畔逢君醉不迷小弟鄰莊尚漁獵
一封書寄數行啼

閨怨

閨中少婦不曾愁
春日凝妝上翠樓
忽見陌頭楊柳色
悔教夫壻覓封侯

李頎二十四首

宋少府東溪泛舟

登岸還入舟
水禽驚笑語
晚葉低衆色
濕雲帶繁暑
落日乘醉歸
溪流復幾許

梁公院各賦一物得初荷

微風和衆草大葉長圓陰晴露珠垂合夕陽花影深從
來不著水清淨本因心

題璿公山池

遠公遁跡廬山岑開士幽居祇樹林片石孤峰窺色相
清池白月點禪心指揮如意天花落坐臥閒房春草深
此外俗塵都不染唯餘玄度得相尋

題盧五舊居

物在人亡無見期閒庭繫馬不勝悲窻前綠竹生空地

門外青山如舊時，悵望秋天鳴墜葉。巖岵枯柳宿寒鴟，憶君淚落東流水。歲歲花開知為誰。

二妃廟送裴侍御使桂陽

沅上秋草色蒼蒼，堯女祠無人見精魄。萬古寒猿悲桂水，身歿後椒漿神降時。回雲迎赤豹，飈雨驟文螭。受命出炎海，焚香徵楚詞。垂聽感遺跡，一弔清川湄。

欲之新鄉答崔顥綦母潛

數年作吏家屢空，誰道黑頭成老翁。男兒在世無產業。

行子出門如轉蓬吾屬交歡此何夕南家擣衣動歸客
銅爐將炙相歡飲星宿縱橫露華白寒風卷葉度滹池
飛雪覆地悲峨峨孤城日落見棲鳥馬上時聞漁者歌
明朝東路把君手臘日辭君期歲首自知寂寞無去思
敢望縣人致牛酒

李兵曹壁畫山水各賦得桂水帆

片帆在桂水落日天涯時飛鳥看共度閒雲相與遲長
波無曉夜泛泛欲何之

王母歌

武皇齋戒承華殿端拱須臾王母見霓旌照耀騏驎車
羽蓋淋漓孔雀扇手指玄黎遣帝食可以長生臨寓縣
頭上復戴九星冠總領玉童坐南面欲聞要言今告汝
帝乃焚香請此語若能鍊鬼去三尸後當見我天皇所
顧謂侍女董雙成酒闌可奏雲和笙紅霞白日儼不動
七龍五鳳紛相迎惜哉志驕神不悅歎息馬蹄與車轍
複道歌鐘杳將暮深宮桃李花成雪為看青玉五枝燈

蟠螭吐火光已絕

古從軍

白日登山望烽火，昏黃飲馬傍交河。
行人刁斗風砂暗，公主琵琶幽怨多。
野營萬里無城郭，雨雪紛紛連大漠。
胡鴈哀鳴夜夜飛，胡兒眼淚雙雙落。
聞道玉門猶被遮，應將性命逐輕車。
年年戰骨埋荒外，空見蒲桃入漢家。

晚歸東園二首

出郭喜見山東行，亦未遠夕陽帶歸鷺。
靄靄秋稼晚樵

者乘霽歌野人及星飯請謝朱輪客垂竿不復返
荆扉帶郊郭稼穡向東菑倚杖寒山暮鳴梭秋葉時迴
雲覆陰谷返景照霜梨澹泊真吾事清風別有資

裴尹東溪別業

公才廊廟器官亞河南守別墅臨都門驚湍急前後舊
交與羣從十日一攜手幅巾望寒山長嘯對高柳清歡
信可尚散吏亦何有岸雪青城陰水光搖林首閒觀野
人筏或飲川上酒幽雲澹徘徊白鷺飛左右庭竹垂臥

內村烟隔南阜始知物外清簪紱固芻狗

送綦毋三謁房給事

夫子大名下家無鍾石儲惜哉湖海上曾校蓬萊書外
物非本意此生空澹如所思但乘興遠適唯單車高道
時坎軻舊交願吹噓徒言青瑣闥不受承明廬百里人
戶滿片言諍訟疎手持蓮花經目送飛鳥餘晚景南路
別炎雲中伏初此行儻不遂歸食蘆洲魚

送劉昱

八月寒荻花秋江浪頭白北風吹五兩誰是潯陽客
鷓鴣山頭微雨晴揚州郭裏暮潮生行人夜宿金陵渚試
聽沙邊南鴈聲

送郝判官

楚城木葉落夏口青山遍鴻鴈向南時君乘使者傳
楓林帶水驛夜火明山縣千里送行人蔡州如眼見江
連清漢東逶迤遙望荆雲相蔽虧應問襄陽舊風俗為
余騎馬習家池

聖善閣送裴迪入京

雪華斂高閣苔色上鉤欄藥草空階靜梧桐返照寒清
吟可愈疾攜手暫同歡隊葉和金磬飢鳥鳴露盤伊川
惜東別灞水向西看舊託含香署雲霄何足難

贈別張兵曹

漢家蕭相國功蓋五諸侯勲業河山重丹青錫命優君
為禁臠堦爭看玉人遊荀令焚香日潘郎振藻秋新成
鸚鵡賦能衣鸛鶴裘不憚軒車遠仍尋蘿薜幽苑

一作花

梨飛絳葉伊水淨寒流雪滿故關道雲遮祥鳳樓一身
輕寸祿萬物任虛舟別後如相問滄波雙白鷗

放歌行答從弟墨卿

小來好文恥學武世上功名不解取雖沾寸祿已後時
徒欲出身事明主柏梁賦詩不及宴長楸走馬誰相數
斂迹俛眉心自甘高歌擊節聲半苦由是蹉跎一老夫
養雞牧豕東城隅空歌漢代蕭相國豈事霍家馮子都
虛爾當年聲籍籍濫作詞林兩京客故人酒客安陵橋

黃鳥春風洛陽陌吾家令弟才不羈五言破鎔人共推
興來逸氣如濤湧千里長江歸海時別離短景何蕭索
佳句相思能間作舉頭遙望魯陽山木葉紛紛向人落

同張員外諷酬答之作

洛中高士日沉冥手自灌園方帶經王湛牀頭見周易
張康傳裏好丹青鶻冠草屨無名位博奕賦詩聊遣意
清言只到衛家兒用筆能誇鍾太尉東籬二月種蘭蓀
窮巷人稀烏鵲喧聞道郎官問生事肯令鬢髮老柴門

夏宴張兵曹東堂

重林華屋堪避暑況乃烹鮮會嘉客主人三十朝大夫
滿座森然見矛戟北窻臥簟連心花竹裏蟬鳴西日斜
羽扇搖風却珠汗玉盃貯水割甘瓜雲峯峨峨自冰雪
坐對芳樽不知熱醉來但掛葛巾眠莫道明朝有離別

答高三十五留別便呈于十一

累薦賢良皆不就家近陳留訪耆舊韓康雖復在人間
王霸終思隱巖岫清冷池水灌園蔬萬物滄江心澹如

妻子歡同數株柳雲山老對一牀書昨日公車見三事
明君賜衣遣為吏懷章不使郡邸驚待詔初從闕庭至
散誕由來自不羈低頭授職爾何為故園壁掛烏紗帽
官舍塵生白接羅寄書寂寂於陵子蓬蒿沒身胡不仕
羹藜被褐環堵中歲晚將貽故人恥

古行路難

漢家名臣揚德祖四代五公享茅土父兄子弟綰銀黃
躍馬鳴珂朝建章火浣單衣繡方領茱萸錦帶玉盤囊

賓客填街復滿座片言出口生輝光世人逐勢爭奔走
瀝膽隳肝唯恐後當時一顧登青雲自謂生死長隨君
一朝謝病還鄉里窮巷蒼茫絕知己秋風落葉閉重門
昨日論交竟誰是薄俗嗟嗟難重陳深山麋鹿可為鄰
魯連所以蹈滄海古往今來稱達人

送盧少府赴延陵

問君從宦所何日府中趨遙指金陵縣青山天一隅行
人懷寸祿小吏獻新圖北固波濤嶮南天風俗殊春山

連橘柚晚景媚菰蒲漠漠花生渚亭亭雲過湖灘沙暝
村火水霧斂檣烏回首東門路鄉書不可無

送馬錄事赴永嘉

子為郡從事主印清淮邊談笑一州裏從容羣吏先手
持三尺令決遣如流泉太守既相許諸公誰不然孤城
臨海樹萬室帶山烟春日溪湖淨芳洲葭莢連炊飯蟹
螯熟下筯鱸魚鮮野鶴宿簷際楚雲飛面前聽歌送離
曲且駐木蘭船贈爾八行字當聞嘉政傳

戎昱十六首

建中中為
虔州刺史

羅江舍

山縣秋雲閣茅亭暮雨寒自傷庭葉下誰問客衣單有
興時添酒無聊嬾整冠近來鄉國夢夜夜到長安

採蓮曲

雖聽採蓮曲詎識採蓮心漾櫂愛花遠回船愁浪深烟
生極浦色日落半江陰同侶憐波靜看妝墮玉簪潞陽
女兒花滿頭麁麁同泛木蘭舟秋風日暮南湖裏爭唱

菱歌不肯休

聞笛

入夜歸思切，笛聲寒。更哀愁人不願聽，自到枕前來。風起塞雲斷，夜深關月開。平明獨惆悵，飛盡一庭梅。

漢上題韋氏莊

結茅同楚客，卜築漢江邊。日落數歸鳥，夜深聞扣舷。水痕侵岸柳，山翠借厨烟。笑提筐婦，春來蠶幾眠。

閨情

側聽宮官說知君寵尚存未能開笑頰先欲換愁魂寶
鏡窺妝影紅衫裛淚痕昭陽今再入寧敢恨長門

長安秋夕

八月更漏長愁人起常早閉門寂無事滿院生秋草昨
夜西窗夢夢行荆南道遠客歸去來在家貧亦好

衡陽春日遊僧院

曾共劉諮議同時事道林與君相掩淚來客豈知心塔
雪凌春積爐烟向暝深依然舊童子相送出花林

玉臺體題湖上亭

湖入縣西邊湖頭勝事偏
綠竿初長笋紅顆未開蓮
蔽日高高樹迎人小小船
清風長入坐夏月似秋天

早梅

一樹寒梅白玉條
迴臨村路傍溪橋
應緣近水花先發
疑是經春雪未消

移家別湖上亭

好是春風湖上亭
柳條藤蔓繫離情
黃鸝久住渾相識

欲別頻啼四五聲

客堂秋夕

隔窻螢影滅復流北風微雨虛堂秋蟲聲竟夜引鄉淚
蟋蟀何知人自愁四時不得一日樂以此方悲客遊惡

一作客
半落

寂寂江城無所聞梧桐葉上偏蕭索

湖南雪中留別

草草還草草湖東別離早何處愁殺人歸鞍雪中道出
門迷轍跡雲水白浩浩明日武陵西相思鬢堪老

贈別張駙馬

上元年中長安陌見君朝下欲歸宅飛龍騎馬三十四
玉勒雕鞍照初日數里衣香遙撲人長衢雨歇無纖塵
從奴斜抱勅賜錦雙雙蹙出金騏驎天子愛壻皇后弟
獨步明時負權勢一身扈蹕承殊澤甲第朱門聳高戟
鳳凰樓上伴吹簫鸚鵡杯中醉留客泰去否來何足論
宮中晏駕人事翻一朝負譴辭丹闕五年待罪湘江源
冠冕淒涼幾遷改眼看桑田變成海華堂金屋別賜人

細眼黃頭總何在
清宮相見寸心悲
嬾欲今時問昔時
看君風骨殊未歇
不用愁來雙淚垂

苦哉行

寶應中作

妾家清河邊
七葉承貂蟬
身為最小女
偏得渾家憐
親戚不相識
幽閨十五年
有時最遠出
祇到中門前
前年狂寇來
懼死翻生全
今秋官軍至
豈意遭戈鋌
匈奴為先鋒
長鼻黃髮拳
彎弓獵生人
百步牛羊羶
脫身落虎口
不及歸黃泉
苦哉難重陳
暗哭蒼蒼天

涇州觀元戎出師

寒日征西將蕭蕭萬馬叢吹笳覆樓雪祝纛滿旗風遮
虜黃雲斷燒荒白草空金鏡肅天外玉帳靜霜中朔野
長城閉河源舊路通衛青師自老魏絳賞何功槍壘依
沙迴轅門壓塞雄燕然如可勒萬里願從公

從軍行

昔從李都尉雙鞬照馬蹄擒生黑山北殺敵黃雲西太
白沉虜地邊草復萋萋歸來邯鄲市百尺青樓梯感激

然諾重平生
膽力齊芳筵
暮歌發豔粉
輕鬟低半酣
秋風起鐵騎
門前嘶遠戍
報烽火孤城
嚴鼓輦揮鞭
望塵去少婦
莫含啼

唐百家詩選卷五

欽定四庫全書

唐百家詩選卷六

宋 王安石 編

沈千運四首

感懷弟妹

今日春氣暖東風杏花坼筋力久不如却羨澗中石神
仙杳難準中壽稀滿百逐世多天傷喜見鬢髮白杖藜
竹樹間宛宛舊行跡豈知林園主却是林園客兄弟可

存半空為亡者惜冥冥無再期
哀哀望松柏骨肉能幾
人年大自疎隔性情誰免此
與我不相易唯念得爾輩
時看慰朝夕平生茲已矣
此外盡非適

贈史修文

故人阻千里會面非前期
握手於此地當歡返成悲
念離宛猶昨俄已經數晷
曠昔皆少年別來髮如絲
不道舊姓名相逢知是誰
曩遊盡騫耆與君仍布衣
豈曰無其才命理應有時
前路漸欲少不覺生涕洟

濮中言懷

聖朝優賢良草澤無遺匿人生各有命在余胡不淑一
生但區區五十無寸祿衰退當棄捐貧賤招禍讎栖栖
去人世屯躓日窮迫不如守田園歲晏望豐熟壯年失
宜盡老大無筋力始愴前計非將貽後生福童兒新學
稼少女未能織顧此煩知己終日求衣食

山中作

棲隱非別事所願離風塵不辭城邑遊禮樂拘束人爾

來歸山林庶事皆吾身何者為形骸誰是智與仁寂寞
了閒事而後知天真咳唾矜崇華迂俯相屈伸如何巢
與由天子不知臣

王季友二首

別李季友

栖鳥不戀枝喑喑在同聲行子馳出戶依依主人情昔
時霜臺鏡醜婦羞爾形閉匣二十年皎潔常猶明今日
照離別前途白髮生

寄韋子春

出山秋雲曙山木已再春
食我山中藥不憶山中人
山中誰余密白髮惟相親
雀鼠晝夜無知我廚廩貧
依依北舍松不厭吾南鄰
有情盡棄捐土石為同身

于逖二首

野外作

老病無樂事歲秋悲更長
窮郊日蕭索生意已蒼黃
小弟髮亦白兩男俱不強
有才且未達况我非賢良
幸以

金匱四庫全書
卷六
朽鈍姿野外老風霜寒鷓噪晚景喬木思故鄉魏人宅
蓬池結網佇鱸鮐水清魚不來歲暮空彷徨

憶舍弟

衰門少兄弟兄弟惟兩人饑寒各流浪感念傷我神夏
期秋未來安知無他因不怨別天長但願見爾身茫茫
天地間萬類各有親安知汝與我乖隔同胡秦何時對
形影憤懣當共陳

孟雲卿五首

古樂府挽歌

草草門巷喧塗車儼成位冥冥何得盡載我生人意北
邛路非遠此別終天地臨穴頻撫棺至哀反無淚爾形
未衰老爾息猶童稚骨肉安可離皇天若容易房帷即
靈帳庭宇為哀次薤露歌若斯人生盡如寄

今別離

結髮生別離相思復相保如何日已遠五變中庭草渺
渺天海途悠悠吳江島但恐不出門出門無遠道遠道

行既難家貧衣服單巖風吹積雪晨起鼻何酸人生為
有志豈不懷所安分明天上日生死誓同歡

悲哉行

孤兒去慈親遠客喪主人莫吟苦辛曲此曲誰忍聞可
聞不可見去去無影跡行人念前程不待參辰沒朝亦
常苦饑暮亦常苦饑飄飄萬餘里貧賤多是非少年莫
遠遊遠遊多不歸

古別離

朝日上高臺離人愁秋草如見萬里天不見萬里道含
酸欲誰訴轉轉傷懷抱君行本遙遠苦樂良難保宿昔
夢同衾憂心轉顛倒結髮年已遲征行去何早寒暄有
時謝憔悴亦難好人皆算年壽死者何曾老少壯無見
期水深風浩浩

傷懷贈故人

稍稍晨鳥翔浙浙草上霜人生早艱苦壽命恐不長二
十學已成三十名不彰豈無同門友貴賤易中腸驅馬

行萬里悠悠過帝鄉幸因弦歌未得上君子堂衆樂互
喧奏獨子備笙簧坐中無知音安得神揚揚願因高風
起上感白日光

張彪四首

雜詩

富貴多勝事貧賤無良圖上德兼濟心中才不如愚商
者多巧智農者爭膏腴儒生未遇時衣食不自如久與
故交別他榮我窮居到門嬾入門何況千里餘君子有

褊性矧乃尋常徒行行任天地無為強親疎

神仙

神仙可學無百歲名大約天地何茫茫人間半哀樂浮
生亮多感善事翻為惡爭先等驅逐中路苦瘦弱長老
思養壽後生笑寂寞五穀非長年四氣乃靈藥列子何
必待吾心滿寥廓

北遊遠酬孟雲卿

忽忽望前事志願能相乖衣馬久羸敝誰信文與才善

道居貧賤潔服蒙塵埃行行無定心壞坎難歸來慈母
憂疾疢室家念栖哀與君宿姻親深見中外懷俟余惜
時節悵望臨高臺

古別離

別離無遠近事歡情亦悲不聞車輪聲後會將何時去
日忘寄書來日乖前期縱知明當返一息千萬思

趙微明三首

回軍跋者

既老又不全始得離邊城一枝假枯木步步向南行去
時日一百來時一月程常恐道路傍掩棄狐兔瑩所願
死鄉里到日不願生聞此哀怨調念念不忍聽惜無異
人術倏忽具爾形

挽歌詞

寒日蒿上明淒淒郭東路素車誰家子丹旌引將去原
下荆棘叢叢邊有新墓人間痛傷別此是長別處曠野
何蕭條青松白楊樹

思歸

為別未幾日去日如三秋猶疑望可見日日上高樓惟
見分手處白蘋滿芳洲寸心寧死別不忍生離憂

元季川四首

泉上雨後作

風雨蕩繁暑雷息佳霽初衆峰帶雲雨清氣入我廬
颼颼涼颼來臨窺愜所圖綠蘿長新蔓裊裊垂坐隅
流水復簷下丹砂發清渠養菖為我衣種芋為我蔬
誰是畹

與畦彌漫連野蕪

登雲中

灌田東山下取樂在爾休清興相引行日日三四周白
鷗與我心不厭此中遊窮覽頗有適不極趣無幽惛然
歌採薇曲盡心悠悠

山中晚興

河漢降玄霜昨來節物殊媿無神仙姿豈有陰陽俱靈
鳥望不見慨然悲高梧華葉隨風揚珍條雜榛蕪為君

寒谷吟嘆息知何如

古遠行

悠悠遠行者羈獨當時思道與日月長人無茅舍期出
門萬里心誰不傷別離縱遠當白髮歲月悲今時何況
異形容安須與爾悲

殷遙二首

潤州人忠王
府倉曹參軍

友人山亭

故人雖薄宦往往涉青溪
鑿牖對山月褰裳拂澗霓
遊

魚逆水上宿鳥向風栖一見桃花發能令秦漢迷

山行

寂歷青山曉山行趣不稀
野花成子落江燕引雛飛
暗草薰苔徑晴楊掃石磯
俗人猶語此余亦轉忘歸

李嘉祐十二首

字從一大歷中
為袁州刺史

晚春宴無錫蔡明府西亭

茅簷閒寂寂無事覺人和
井近時澆圃城低不見河
興緣芳草積情向遠峰多
別日歸吳地停橈更一過

送宋中舍遊江東

孤城郭外送王孫，越水吳洲共爾論。
野寺山邊斜有徑，漁家竹裏半開門。
青楓獨映搖前浦，白鷺閒飛過遠村。
若到西陵征戰處，不看秋草自傷魂。

送王端赴朝

君承明主意，日日上丹墀。
東閣論兵後，南宮草奏期。
人稀傍河處，槐暗入關時。
獨遣吳州客，平陵結夢思。

自蘇臺至望亭驛，人家盡空春物增。
思悵然有

作因寄從弟紆

南浦菰蔣覆白蘋
東吳黎庶逐黃巾
野棠自發空流水
江鷺初歸不見人
遠樹依依如送客
平田渺渺獨傷春
那堪回首長洲苑
烽火年年報虜塵

題靈臺縣東山村主人

處處征胡人漸稀
山村寥落暮煙微
門臨莽蒼經年閉
身逐嫖姚幾日歸
貧妻白髮輸殘稅
餘寇黃河未解圍
天子如今能用武
祇應歲晚息兵機

至七里灘作

遷客投於越，臨江淚滿衣。
獨隨流水遠，轉覺故人稀。
萬木迎秋序，千峰駐晚暉。
行舟猶未已，惆悵暮潮歸。

題前溪館

兩年謫官在江西，舉目雲山要自迷。
今日始知風土異，潯陽南去鷓鴣啼。

送樊兵曹潭州謁韋大夫

塞鴻歸欲盡，北客始辭秦。
零桂雖逢竹，湘川少見人。
江

花鋪淺水山木暗殘春脩刺轅門裏多憐爾為親

送從弟歸河朔

故鄉那可到令弟獨能歸諸將矜旄節何人重布衣空
城流水在荒澤舊村稀秋日平原路蟲鳴桑葉飛

送王牧往吉州謁王使君

細草綠汀洲王孫奈薄遊年華初冠帶文體舊弓裘野
渡花爭發春塘水亂流使君憐小阮應念倚門愁

早秋京口旅泊章侍御寄書相問因以贈之

移家避寇逐行舟，厭見南徐江水流。
吳地征徭非舊日，秣陵凋弊不宜秋。
千家閉戶無砧杵，七夕何人望斗牛。
祇有同時驄馬客，偏題尺牘問窮愁。

江湖愁思

趨陪禁掖鴈行隨，遷向江潭鶴髮垂。
素浪遙疑八谿水，青楓忽似萬年枝。
高南春徧傷魂夢，壺口雲深隔路岐。
共望漢朝多霈澤，蒼蠅早晚得先知。

姚係二首

送周愿判官歸嶺南

早蟬望秋鳴夜琴怨離聲眇然多異感值子江山行由
來重義人感激事縱橫往復念遐阻淹留慕平生晨奔
九衢餞暮始萬里程山驛風月榭海門煙霧城易綯泉
源近拾翠沙澍明蘭蕙一為贈貧交空復情

京口遇舊識兼送往隴州

蟬鳴一何急日暮秋風樹即此不勝愁隴陰人更去相
逢與相失共是亡羊路

雍裕之二首

貞元
後人

五雜俎

擬古三首

五雜俎刺繡窠往復還織錦梭不得已成交河

自君之出矣

擬後漢徐幹

自君之出矣寶鏡為誰明思君如隴水長聞嗚咽聲

蔣渙一首

和徐侍郎中書叢篠詠

中禁夕沈沈幽篁別作林色連雞樹近影落鳳池深為

重陵霜節能虛應物心年年承雨露長對紫庭陰

陳羽五首

送靈一上人

十年勞遠別一笑喜相逢又上青山去青山千萬重

送友人及第歸江東

五陵春色泛花枝心醉花前遠別離落第恥為關右客
成名空羨里中兒都門雨歇愁分處山店燈殘夢到時
家住洞庭多釣伴因來相賀語相思

伏翼洞送夏方慶

洞裏春晴花正開
看花出洞幾時回
殷勤好去武陵客
莫引世人相逐來

春日客舍晴原野望

東風吹暖氣消散
入晴天漸變池塘色
欲生楊柳煙蒙茸
花向月潦倒客經年
鄉思盈愁望江湖春水連

公子行

金羈白面郎何處
蹋青來馬驕郎半醉
躡蹠望樓臺似

見樓上人玲瓏窗戶開隔花聞一笑落日不知回

楊衡七首

盧十五竹亭送姪偁歸山

落葉寒擁壁清霜夜沾石正是憶山時復送歸山客殷
勤一樽酒曉月當牕白

哭李象

白雞黃犬不將去寂寞空餘葬時路草死花開年復年
後人知是何人慕憶君思君獨不眠夜寒月照青楓樹

白紵詞二首

玉纓翠珮雜輕羅香汗微漬朱顏醜為君起唱白紵歌
清聲裊雲思繁多凝笳哀瑟時相和金壺半傾芳夜促
梁塵霏霏暗紅燭令君安坐聽終曲墜葉飄花難再復
躡珠履步瓊筵輕身起舞紅燭前芳姿豔態妖且妍回
眸轉袖暗催絃涼風蕭蕭漏水急月華泛濫紅蓮濕牽
裙攬帶翻成泣

題花樹


都無看花意，偶到樹邊來。
可憐枝上色，一一為愁開。

傷蔡處士

篋中遺草是琅玕，對此令人灑淚看。
三徑尚疑行跡在，數螢猶自映書殘。
晨光不借泉門曉，暝色空添隴樹寒。
欲問皇天天更遠，有才無命說應難。

送人流雷州

逐客指天涯，人間此路賒。
地圖經大庾，水驛過長沙。
臘月雷州雨，秋風桂嶺花。
不知荒徼外，何處有人家。



唐百家詩選卷六